

**Najib sembang santai tentang bola sepak, kerjaya dan MH17**  
**Astro Awani**  
**Jun 9, 2016**

**KUALA LUMPUR:** Ketika pada kebanyakan masa Perdana Menteri Datuk Seri Najib Tun Razak dilihat sebagai figura yang autoritatif, berpakaian segak dan sering bercakap dalam nada berbaur korporat, pemimpin negara itu menunjukkan sisi santainya di Persidangan Wild Digital 2016 di sini hari ini.

Acara dua hari yang dinobatkan sebagai persidangan digital terbesar di Asia Tenggara itu menampilkan Najib sebagai tetamu sesi sembang Fireside Chat yang dihoskan Pengasas Bersama Kumpula Catcha dan Ketua Pegawai Eksekutif Kumpulan, Patrick Grove.

Acara tersebut dimulakan dengan Grove mempelawa Najib memakai baju *hoodie* yang direka khusus buat beliau, dan Perdana Menteri telah menyarungkannya dengan gembira.

Perbualan kemudiannya beralih kepada selera muzik Najib dan artis kegemaran serta kewujudannya dalam media sosial.

Dalam perbualan itu juga, Najib mengesahkan memiliki tempat duduk khas (*dugout seat*) yang pernah digunakan pengurus legenda Manchester United, Sir Alex Ferguson.

“Walau bagaimanapun, saya tidak akan mendedahkan di mana ia disimpan,” ujar Najib sambil ketawa kecil.

Grove juga bertanya bagaimana Najib berdepan dengan urusan seharian sebagai pemimpin nombor satu negara.

Suasana perbualan kemudiannya bertukar sayu apabila Najib bercerita tentang pengalamannya menguruskan isu melibatkan tragedi nahas pesawat Malaysia Airlines MH17.

“Sangat sukar untuk berurusan dengan keluarga yang kehilangan orang yang mereka sayangi. Bagaimanapun, saya terus bertanya pada diri saya, apa yang saya boleh bantu mereka dalam apa cara sekalipun?”

“Mungkin dengan memberikan mereka suatu penutup, ia dapat membantu mereka menguruskan kesedihan mereka. Kemudian, saya mengambil keputusan untuk

mengaktifkan rangkaian antarabangsa saya. Dari situlah saya dapat menghubungi Alexander Borodai (pemimpin pemberontak Rusia),” ujar Najib.

Beliau seterusnya mengimbas semula detik perbualannya dengan Borodai dalam usaha mendapatkan semula kotak hitam dalam tragedi besar tersebut.

Najib menamatkan sesi sembang itu dengan mengambil gambar selfie dengan Grove serta 450 peserta persidangan berkenaan.

Tag: [Wild Digital](#), [Najib Razak](#), [Patrik Grove](#), [Najib sembang santai](#)

**© 2016 Astro Awani Network Sdn. Bhd. (535275-D) All Rights Reserved.**

Source: <http://www.astroawani.com/berita-malaysia/najib-sembang-santai-tentang-bola-sepak-kerjaya-dan-mh17-107662>